

Áchtopa ʼama' yej San Pablo kijkuilowilij Timoteo

Pablo kijkuilowiliá Timoteo

¹ Nej niPablo, iyapóstol* Jesucristo, ken tikij-towaj, se yej yéj kitítan, iga ijkón kine' Dios yej tesalvarowa iwán toTeko Jesucristo, yej ípansan wel timoconfiarowaj. ² Timoteo, tej yej ken tinomela'piltzín iga nimitznextilij iga ximoconfiaro ipan Cristo, nimitzijkuilowiliá inín ʼama'. Nikneki iga Dios yej toTaj iwán toTeko Cristo Jesús, mamitzyolchikawa, mamitzikneli iwán makichíwa iga xono tamelá.

Pablo kinonotza Timoteo iga sekin yej ayompa tamachtiáj

³ Ken nimitzijlijté' kuá' nikísa' iga niajki estado de Macedonia iga xikáwi altepe' Éfeso, iga xikijlįkan yej ayompa tamachtiáj iga ay' máj ijkón makichiwakan. ⁴ Niga no maki-nagasmakakan cuento yej motenchíwapa, niga makiyoltilantokan iga makimatikan itokamej to-ikyapatajwan. Inón tachíwaltiá iga mamokuejkuesolo iwán ayá' tepalewiá iga tikchíwaj ken Dios kineki, inón welsan tikchíwaj iga timoconfiarowaj ípan.

* **1:1** 1:1 Xikita glosario "Apóstol".

⁵ Nimitztajtani*liá* iga xitan*extili* iga mamomela'sepanchokilikan. Petz yejsan kimatitokej iga kichiwaj yej ye*kti* iwán momela'confiarowaj pan Dios, wel ijkón mochokili*áj*. ⁶ Sekin kika*jtéjkeja* nochi in*ín* wán mopojpoló*jkeja* ipan xeto'tajtolme*j*. ⁷ Kinekij matamach*tikan* ipan iley Dios, e' niga yejemej ayá' kimatij te kijo*jneki* yej kijtowaj, niga yej tan*extiliáj*.

⁸ Tikmatij iga la ley ye*kti*, e' siga tiken*tenderowaj* tejas iga mo-ijkuilo*j*. ⁹ Matikmatikan iga la ley ayá' ono' iga yej ye'nem*ij*, sino iga inomej yej yoltakuaktikej iwán yej ayá' tac*redowaj*, iga yej pox kichiwaj yej ay*ekti*, iga yej ayá' kitajtolku*ij* Dios iwán kimali*liáj*, yej kimiktiá itaj iwán iye', iwán inochi yej tamik*táj*, ¹⁰ iwán iga yej mosenteka iwán yej ayá' iwán namiktito' o moteka iwánsan itaga-ikn*ín*, iga yej kichteki se tokn*ín* iwán kitajtani tom*ín* iga makimajk*awa*, iga yej tayokakajkayawaj iwán iga yej kijtowaj "kitzto' Padre", malej iga kimatij iga nemi takajkayawaj. La ley no ono' iga nochi yej ayá' kichiwaj ken tan*extiliá* itájtol Dios. ¹¹ In*ín* itájtol Dios ino*nya* ye'noticia*j* yej tamánaw*íá* yej Dios netekimá' iga manikpowa.

Pablo kimaka gracias Dios

¹² Nikmaka gracias toTeko Jesucristo iga neye'ita' iga manikchi*wa* itekipánol. ¹³ Malej iga nej ikya nimaltajto*waya* de Cristo, iwán kuajkuantas nikijli*aya* yej kitokaj Cristo, nikpre*sojwiayaj* iwán nikiknochi*wayaj*; e' Dios ne*chokilij* iga aya nikmat*íá* te nikchi*waya* iga aya nic*redowaya* ipan Cristo. ¹⁴ Dios poxsan

ne-iknelij iwán nepalewíj iga manimoconfiaro ipan Cristo Jesús wán manikneki tokniwán.

¹⁵ Inín yej nia nimitzijlitij ijkonya nokta iwán kajasi iga inochi gente makicredo: Jesucristo wálaj ipan inín tajli iga kimanawiko yej ayompa nemij, e' nejwa' in yej máj ayompa ninemiá.

¹⁶ E' Dios nechokilij iga ipan nej, yej máj ayompa ninemiá, monextiá iga Jesucristo ayá' nimanín kuesiwi'. Iwán ijkón iga mamixkuítikan ipan nej iwán nō mamocnfiarokan ipan Jesucristo, ijkón wel nochipa onoskej itenōj Dios.

¹⁷ Inón iga mamoweyimatilti toDios yej nochipa mandarowa, yej nikeman ayá' miki, yej atikitaj iwán yéjsan iselti Dios yej nochi nokta kimati. Ijkónyawa'.

¹⁸ Timoteo yej ken tinopiltzin, nimitztekimaka iga xikchiwa ken kijtojkej tokniwej yej Dios kitajtolmá' iga tej. Siga ijkón tikchiwas, tonos ken se soldado yej ayá' mosemaka pan itekipánol.

¹⁹ Amo xikajtewa iga ximoconfiaro ipan Dios, xikchiwa yej yekti ken mitznextiliá moalmaj. Sekin iga ayá' kichijkej yej yekti ken kimatitoyaj ipan iyalmajmej, kikajtejkej iga moconfiarojkej ipan Dios.

²⁰ Ijkón kichijkej Himeneo iwán Alejandro, yej niktitan ipan ima' Tzitzimi' iga makichiwilikan ken yéj kineki iga makimatikan iga ayekti iga makimalijlikan Dios.

2

Ken iga mamotengewi Dios

¹ Inín yej máj nikneki mamochiwa, nochipa mamotajtanili Dios iga tamelá maonolo, iwán

mamomaka gracias Dios. ² Matiktajtaniłikan Dios iga inochi reyejmej iwán inochi tekiwajmej, iga matonokan tamelá iwán wel matiye'nemikan iyixtaj Dios iwán wel mateye'ita. ³ Pox yełti iga ijkín tiktenewiáj Dios, inón kipoxye'ita Dios yej temanawiá, ⁴ iga yej kineki iga nochi mamomanawikan iwán makimela'matikan yej melá' nokta. ⁵ Ono' sesan Dios, iwán ono' sesan yej wel tetajtowiliá itenoj Dios: inonwa' Jesu-cristo yej taga' ⁶ yej motemá' iga mi' iga nochi toknimej wel mamosalvaro, inín momatiko kuá' nokta Dios kine'. ⁷ Ijkón iga Dios netapejpen iga nikpowa' itájtól, iga inón nokta netitankej iga manikmachtikan yej ayéj judiyojmej iga no mamokonfiarokan ipan yej melá' nokta. Ayá' nitakajkayawa, nikijtowa yej cierto.

⁸ Nikneki iga noyan kan motenewiá Dios, tajtaga' yej ye'nemij makajkokuikan imamej, amo makuesitokan iwán amo agaj íwan mamokuejkuesojtokan. ⁹ Iwán siwatkej iga manesi iga ye'nemij, amo makakikan wípil yej akajasi iga makakikan yej kitokaj toTeko. Amo mamotziztikuikan kansan póxsanya iga maye'nesikan, iwán amo makitalikan yej xojxota, ken oro niga perla,* ¹⁰ sino que siwatkej makichiwakan yej yełti iga manesi iga ye'nemij ken kineki Dios. ¹¹ Kuá' taga' tamachtía ipan itájtól Dios, siwá' amo matajto, wan matakredo. ¹² Ayá' nikneki iga siwá' matamachtí, niga makimandaro taga'. Sino que san matakakto.

* **2:9** 2:9 Perla pox valerowa, ken tikita tetzın ke'pa ajayo' wan iga perla wel mochıwa koska'.

13 Iga Dios achto kichij Adán iwán después kichij Eva. 14 Iwán ayéj Adán yej kikajkayajkej, Évajwa' in yej kikajkayajkej, iwán kichij yej ayekti. † 15 E' siwa' momañawij siga kiyé'iskaltiá ipilowan, siga moconfiarowa ipan Dios, siga te-ijiknïn, siga ye'nemi iyixtaj Dios iwán ayá' kichjwa yej ayekti.

3

Ken iga manemikan pastorme

1 Siga se taga' mochiwasneki pastor,* inön kena kichiwasneki ye'tekipánol. 2 Yej óno'ya iga pastor maye'nemi iga ijkón awel kipopowaj, makipiá sesan isiwa', nochipa makichjwa yej yekti, maye'tajlanto, makiye'itakan, nochipa ichan maki-omemawi paxalowanimej iwán wel matamacht i pan itájtol Dios. 3 Amo matawana, niga matakuejkueso, niga makineki tomïn yej ayompa motaniá, majwa' mate-ijiknïn, iwán mayoltzopeli' iwán amo makipoxpiasneki tomïn. 4 Wel makichjwa iga maye'nemikan nochi yej onokej ichan; ipilowan matacredokan iwán matamajmawilikan. 5 Siga awel kichjwa iga maye'nemikan isiwa' iwán ipilowan, ¿kén wel kichjwas iga maye'nemikan yej yéjpa kicuidarowa, yej kitokaj Dios? 6 Awel mochiwas pastor yej kicrédojo' Dios, amo santá' mowey-imatis iwán ya'ti kan tawewelkato' kan ya'ti Tzitzimi'. 7 No se yej mochiwasneki pastor, maye'tajtokan iga yéj ken iga nemi.

† 2:14 2:14 Gn 3:1-6 * 3:1 3:1 Pastor: xikita glosario "Obispo".

Maye'tajtokan nō iga yéj yej ayá' kitokaj toTeko iga amo agaj makipopowa, iwán amo mamokx- ipolo ipan iyojwi toTeko ken kichiwaltijneki Tzitzimi'.

Ken manemikan diaconojmej

⁸ Ijkonsan nō diaconojmej† makiye'itakan; amo matakajkawakan, amo matawanakan, amo makinekikan tachte'tomin. ⁹ Makichitokan ken kijtowa itájtōl Dios, iwán makimatitokan ipan iyalmajmej iga ayo' kichijtokej yej ayekti. ¹⁰ Achto mamō-ita siga ye'nemij, ijkón wel mochīwaskej diácono siga kiye'itaj. ¹¹ Ijkonsan nō siwatkej maye'nemikan iga makiye'itakan, amo matapopowakan, iwán amo makichiwakan yej ayekti siga ijkón kineki iyalmajmej iwán nochipa matawelnemikan. ¹² Diaconojmej makipiakan sesan isiwamej, iwán wel makichīwa iga maye'nemikan ipilowan iwán nochi yej ono' ichamej. ¹³ Iga diaconojmej yej kiye'chīwaj itekipánōl, ye'tajtōskej iga yejemej, iwán sekin máj wel kitajtōlkakiskej kuá' kipowaskej ken iga moconfiarowaj ipan Cristo Jesús.

¹⁴ Nimitzijkuilowiliá inín ama'; e' ayá' wejkatís niáj nimitzitati ¹⁵ e' siga awal nimanín nimitzpaxalowilīti, inán tikmátiya ken iga matiye'nemikan tejemej yej ipilowan Dios yej isato'; ken tikijtowaj, nochi yej tiktokaj Dios. Tejemen tikijtowaj iwán tikmanawiaj yej melá' nokta.

† 3:8 3:8 Xikita glosario "Diácono wān diaconisa".

Ken mochij kuꝥ' onokꝝya Jesús

¹⁶ Tikmela' matij iga inin yej aya momatiá, yej ticredowaj pox yekti:
 Dios wꝋalaj ken se taga';
 IyEspíritoj Dios kinojma-ijtoj iga ayí' kichij yej
 ayekti,
 iwán angelejmej‡ kitakej,
 iwán noyan ipan paismej mopowa',
 iwán noyan ipan inin tajli kicredojkej,
 iwán tejkaj sej ipan cielo.

4

Yej yawij kikajtewatij iga moconfiarowaj ipan Dios

¹ IyEspíritoj Dios kinojma-ijtoowa iga kuꝥ' ay'ya wejka iga wí' toTeko, sekin yawij kikajtewatij iga kitokaj Dios, iwán kitokaskej malespíritojmej yej takajkayawaj wan yej tamachtiáj ken Tz-itzimi' kineki. ² Kitajtolkuiskej yej nésiki' kitokaj Dios, siempa nemi takajkayawaj, este ay'ya momachiliáj ipan iyalmajmej iga ayompa nemij. ³ Yejemen tamachtiskej iga ayéktiki' mamonamiktilo, iwán ay'yaki' mamokua sekin tákual. E' Dios kichij nochi yej wel mokua, iwán matikmakakan gracias iga inon tákual tonochin yej timoconfiarowaj ipan yéj, wan tikixmatij kén nokta tamachtiá itájtól. ⁴ Iga nochi yej Dios kichij yekti iwán awel tikijoskej iga ayekti, sino que wel tikuaj, e' achto matikmakakan gracias Dios. ⁵ Iga yej Dios kijtoj iwán iga tikmakaj gracias Dios, yéktiya iga mokua.

‡ **3:16** 3:16 Xikita glosario "Ángel".

Pablo kinonotza Timoteo

⁶ Siga inín tiknextiliá toknimej, tiye'tekipanoj iga Jesucristo, siga timomachtiá wān tikchiwa ken kijtowa ye'tájtōl, inón kenkuá' tiye'takua. ⁷ Amo xiknakasmaka xeto'tatapowalis yej tága'pa kijtowa. Majwa' xikchijto ken Dios kineki. ⁸ Yekti iga xikchiwa ejercicio, e' máj yekti iga xikchijto ken Dios kineki, inón mitzpalewiá ipan inín tajli iwán nō kuá' tonos kan ono' Dios. ⁹ Inín sí ijkonya nokta, iwán yekti iga inochi makicredo. ¹⁰ Inón iga anisiawij iga titekipanowaj wān te-iknochiwaj iga timoconfiarowaj ipan Dios yej isato' yej kisalvarowa nochi gente, e' máj kisalvarowa yej kicredowaj ipan.

¹¹ Xitanextili inín yej nimitzijlij iwán xitatemakama iga mamochiwa. ¹² Amo agaj mamitzalimpamati iga aya tiyolej; majwa' wel ipan tej mamixkujikan ken iga titajtowa, ken iga tinemi, ken iga tite-ijiknin, tiyolyamani', ken iga timoconfiarowa pan Dios wān iga ateyi nité yej ayekti ipan moalmaj. ¹³ Mij násiso' ompiga, xikleerowilijto itájtōl Dios tokniwān, xiknonotzakān iwán xikmachtikan. ¹⁴ Amo xikelkawa iga pastormej mitztaľilijkej imamej pan motzon-tekon kuá' Dios kitajtolmakakej, iwán kijtojkej iga Dios mitzpalewiá iga xikchiwa motekipanōl.

¹⁵ Nochipa xikchijto yej nimitzijliá, iga nochi makita iga tikchijtiá ken Dios kineki. ¹⁶ Xikita ken iga tinemi iwán ken iga titamachtiá, iwán ijkón xikchijto, siga ijkón tikchiwa, timomanawij, iwán nō momanawiskej yej mitzkakiskej.

5

Kén iga se maye'nemi iyixtaj tokniwan

¹ Se totajwéj yej kicredowa Cristo, siga ayompa kichíwa, amo xikajajwa; majwa' xiknonotza ken tikchíwaya siga tiknonotzaya motaj, iwán chokomej xikita ken mokniwan. ² Toy'elamatkej xikita ken moye', iwán takomej ken tikita mosiwa-ikniwan, amo xikejlamikili yej ayekti.

³ Xikpalewi siwa' yej mi'ya iwéj, yej ayagaj kipalewiá. ⁴ E' siga se yej wewejmi'ya, kipiá ipilowan o inietojmej, inimej achto yej makipalewikān iyemej, iga ijkōn kenkuá' kikuepaj iga moskaltijkej, ijkōn yekti iwán kiye'ita Dios. ⁵ E' yej mi'ya iwéj, iwán káwi'ya nokta iselti, inōn kisentaliá iyalmaj ipan Dios, semilwi' wan tayowakan kitenewiá Dios. ⁶ E' yej mi'ya iwéj iwán moyolpolojto' ipan yej kuajkuantas yejsan kineki iyalmaj, inonwa' kenkuá' mikto' malej iga isato'. ⁷ Inōn iga xitanonotza ipan inimej yej nimitzijlij iga amo agaj makipopowakan. ⁸ Si agaj ayá' kipalewiá yej de ifamíliajpa, inōn ayá' nemi kichíwa ken kijtowa Dios, iwán mochíwa majya sej que yej ayá' kicredojto' Dios.

⁹ Xikijkuilokan ipan ama' itokamej yej mi'ya iwéj, yejsan kipiá sesenta iyañoj o máj, iwán yej sesan iwéj kipiá'.* ¹⁰ Yej momati iga kichij yej yekti, kiye'iskaltij ipilowan, komemawij ichan yej kipaxalowiliáj, kijikxipaga' toknimej yej kicredojtokej Dios, kiyolchikaj yej moknomatij iwán kiyolmá' iga kichij nochi yej yekti.

* **5:9** 5:9 O ayí' kixíma' iwéj.

11 E' yej mi'ya iwéj yej aya kipiá inín edad, amo xikijkuilo itoka', amo santá' ipan iyalmaj kinekis sej mamonamikti, wan ijkón kelkawas iga kitoka Cristo, 12 iwán ijkón kichíwa yej ayékti iga kikajtewa ken achto moconfiarowaya ipan Cristo.† 13 Iwán nō nentinemi ipan cada kajli, ay' kiyolmaka tē kichíwa, ayéj san iga inón, sino que tapopojtinemi, iwán tatentemowa iwán kijtowa yej ayá' kajasi iga mamō-ijto. 14 Nikneki iga yej wewejmikikej mamonamiktikan, makipiakan ipilowan, matakuidarokan ichamej, ijkón awel temalijliáj yej te-ijiya. 15 Sekin viudajmej mopolójkeja iwán kitokákeja iyojwi Tzitzimi'.

16 Si agaj yej kicredojo' Dios kipiá ichan se isiwa-iknín yej mi'ya iwéj, yéj makimakato tē kipolowa, amo tokniwan yej kicredojo'ke' Dios makimakatokan, ijkón tokniwan wel kipalewiáj yej ay'ya nokta kipiá a' kipalewiá.

17 Pastorme' yej kiyē'ojkuiltiáj tokniwan, kajasi iga pox makiye'itakan, mamō-ita ijkón yej tekipanowaj iga kipowaj iwán tamachtiáj ipan itájtōl Dios. 18 Iga ijkín kijtowa itájtōl Dios: "Amo xikten-ilpi toro kuá' nemi koyá trigo iga iyikxi." Ijkonsan nō: "Yej tekipanowa kajasi iga makixtawakan."

19 Amo xiktajtōlkuili yej kitelwiá se pastor siga yej tatelwiá ayá' nemi iwán ome o eyi yej nō kinojma-itakej yej mochij. 20 E' siga se pastor kichijto' yej ayékti, xiknōtza iyixtaj toknimej

† 5:12 5:12 O: iwán ijkón kichíwa yej ayékti iga kikajtewa ken achto kijtoj iga ay' sej monamiktiá iga kitokasan Cristo, iwán ay' keklamikis iga wewejyowis.

yej kitokaj toTeko iga maye'nemi, iga ijkón sekin nò mamajmawikan iga amo makichiwakan yej ayekti. ²¹ Nimitzijliá iyixtaj Dios, iwán iyixtaj Jesucristo iwán iyixtaj iyangelejmej yej Dios kitapejpen, iga xikchiwa kensan nimitzijlij. Kuá' titajuzgarowa amo sesan xikye'ita. ²² Kuá' tik-tapejpena se taga' iga matekipano iga Dios, amo xiktali moma' ipan itzontekon iga ti-oradowa siga ayá' tikmati ken iga nemi. Amo santá' ayá' ye'nemi, iwán kijoskej iga tikye'ita yej kichijto'. Nochipa xikchiwa yej yekti.

²³ Iga ayá' tiye'ijtiyoj, amo á'tisan xikonjto, nò xikoni alin vino.

²⁴ Ono' sekin yej nesí iga kichijtokej yej ayekti malej iga aya agaj kijuzgarowaj, e' ono' sekin yej aya nesí siga kichijtokej yej ayekti, inón nesiti kuá' Dios yawi tajuzgaroti. ²⁵ Ijkonsan nò ono' sekin yej nesí iga kichiwaj yej yekti, e' ono' yej kichijto' yej yekti iwán anesi, e' inón ayá' nochipa iyantos.

6

¹ Inochi tekipanowanimej yej esclavojmej,* makirrespetarokan itekomej, ijkón ayagaj wel kimalijliá Dios niga wel kijoskej iga ayompa titamachtíaj. ² Siga se esclavo kipiá iteko yej kicredojo' Dios, amo iga inón makalimpamati iga nò kitoka Dios. Majwa' makiye'chiwili itekipánol iga inón yej nemi kichiwiliá nò kitoka Dios iwán makichokili ken iyiknín. Inín xikpowa iwán xitamachti.

* **6:1** 6:1 Xikita glosario "Esclavo".

Yej kitoka iyojwi Dios mayolpakto ke'ya iga kipiá

³ Siga agaj ayompa tamachtiá, ayéj ken tanextiliá itájtɔl toTɛko Jesucristo, niga ayá' tanextiliá iga matiye'nemikan iyixtaj Dios, ⁴ ininwa' moweyimati iwán akimati nité. Ininwa' itekiy iga mopoxkuesowa iga san kikaki tejté; iwán ompa pewa iga ta-ixita, kuejkuesiwi iwán kuajkuántasya kijtowa iwán ayá' moconfiarowa ipan agaj, ⁵ mokuejkuesowa iwán sekin, pox ayompa tajlamiki wán ayá' kixmati ken nokta tanextiliá itájtɔl Dios. Iwán inimej yej ayompa tamachtiáj, kejlamikij siga tamachtiáj ipan itájtɔl Dios wel matatanikan. Iwán inómejpa amo ximotoka. ⁶ Kena, siga se ye'nemi ipan iyojwi Dios, kenkuá' kasi yej poxsan patiyoj, e' mayolpakto ke'ya iga kipiá. ⁷ Iga nité ayá' tikujligakej ipan inin tajli, iwán nité ayá' tikujgaskej kuá' timikiskej. ⁸ Siga tikpiáj totzótzol iwán tikpiáj te tikuj, matiyolpaktókanya. ⁹ Iga yej motapialijnekij, akijyowiáj kuá' Tzitzimi' kinextiliáj iga makichiwakan yej ayekti, wán wetzij ipan itrampaj. Kiyoltilanaj xeto'nemilis yej tapojpolowa, iwán ipan inón mia' mopoipolowaj. ¹⁰ Kuá' se kipoxpiasneki tomín, ómpaya pewa iga kichíwa mia' yej ajayekti. Iwán ono' sekin iga kipoxpiasnekij tomín, kikajtéwaja iyojwi Dios, iwán imatikámejsan pox moknochiwaj.

Amo mamosemaka yej kitoka Cristo

¹¹ E' tej Timoteo yej tiktoka Dios, amo ijkón xikchiwa. Xiye'nemi, xikchiwa ken Dios kineki,

ximoconfiaro ipan Dios, xite-ijikn̄n, amo niman̄n xikuesiwi iw̄n xiyolyamani'. ¹² Xiktanili nochi yej mitzakuiliá iga xikchiwa ken kineki Dios. Amo xikn̄mpolo yej Dios temaka iga nochipa tonoskej iw̄n. In̄n iga nokta mitzn̄otza' Dios iw̄n mia' mitzkakikej kūa' tiki-jtoj iga tiktokas Cristo. ¹³ Nimitztekimaka iyixtaj Dios yej kimaka vida nochi yej ono', iw̄n iyixtaj Jesucristo yej kinojma-ijtoj t̄e itekiyo in̄á' Poncio Pilato, ¹⁴ iga xikchiwa nochi kensan nimitztekimaka iga ni agaj amo mamaltajto iga tej. Ijk̄n xikchijto este maw̄iki Jesucristo. ¹⁵ Jesucristo yawi w̄jzeti kūa' Dios kijtoj. Dios kichiw̄as in̄n, iga yéjsan yej Dios yej poxsan kipiá poder. Iw̄n yéj irrey inochi reymej iw̄n it̄eko nochi yej mandarowa. ¹⁶ Yéjsan yej ayí' miki iw̄n ono' kan taxotalpan kan ayagaj wel kalaki. Ni agaj ayí' kita' niga wel kita. Yéj nochipa mamoweyimat̄ilti w̄n nochipa marrein̄aro. Ijk̄nyawa'.

¹⁷ Xikijli yej motapialiáj ipan in̄n tajli iga amo mamoweyimatikan, iw̄n amo mamocn̄fiarokan ipan yej kipiáj iga in̄nwa' támisan. Majwa' mamocn̄fiarokan ipan Dios yej isato', yej tepoxmaka yej tepolowa iga matiye'onokan. ¹⁸ Xikijlikan iga makichiwakan yej yekti, iga ijk̄n kichiw̄askej, majya sej que iga makipiakan tom̄in. Iw̄n kūa' agaj kitajtaniliáj tejt̄e in̄omej yej motapialiáj, mapakikan iga wel kipalew̄iáj iyikniw̄n. Iw̄n yej itatkimej, achi makimajmakakan sekin. ¹⁹ Iga ijk̄n kipalew̄iáj iyikniimej, Dios n̄o kipalew̄ij yejemej iw̄n onoskej nochipa iw̄n.

Pablo monawatiá wān Timoteo

²⁰ Timoteo, xikchiwa yej Dios mitztekimá'. Amo xiknakasmaka xeto'tájtōl yej ayá' mitz-palewiá, amo ximotenkítzkikan iwán inomej yej momachiliáj iga poxsan tajtōlmatij, iga yejemej akimatij nité. ²¹ Sekin yej kitokaj inōmpa tamatilis kikajtewaj iyojwi Dios.

Dios mamitzyōlchikawa. Ijkónyawa'.

**Itájtōl toTēko ipan mela'tájtōl
Nahuatl, Isthmus-Mecayapan: Itájtōl toTēko ipan
mela'tájtōl New Testament**

copyright © 2016 Wycliffe Bible Translators, Inc.

Language: Nahuatl, Isthmus-Mecayapan

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

8d5b6a33-8846-5c0f-ae8f-62c94f894f7b